

Inatsisartut suleriaasiat § 33 naapertorlugu Inatsisit atortinneqarnerannut ataatsimiititaliami ilaasortat matumuuna aalajangiiffigisassatut siunnersuut saqqummiuppaat:

Inatsisartut Ombudsmandiata 2012-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersut.

(Inatsisit atortinneqarnerannut ataatsimiititaliap siulittaasua Kristian Jeremiassen, Siumut, Inatsisit atortinneqarnerannut ataatsimiititaliami ilaasortaq Doris Jakobsen, Siumut, Inatsisit atortinneqarnerannut ataatsimiititaliami ilaasortaq Sara Olsvig, Inuit Ataqatigiit, Inatsisit atortinneqarnerannut ataatsimiititaliami ilaasortaq Randi Broberg, Parti Inuit, Inatsisit atortinneqarnerannut ataatsimiititaliami ilaasortaq Jens B. Frederiksen, Demokraatit)

Tunngavilersuut:

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussatut suliaqarnissaanik pisussaaffilersippaa. Taamaalilluni Ombudsmandi Inatsisartut Naalakkersuisunik nakkutilliinerannut sakkuuvoq, kisiannili aamma nunap inuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ataatsimiinnermi tassani Inatsisartut Ombudsmandiata ukiumoortumik nalunaarusiami imarisaata ilaanik ataatsimiititaliamut immikkut soqutiginaatillit ataatsimiititaliamut paasissutissiissutigineqarput.

Ombudsmandip 2012-mut ukiumoortumik nalunaarusiaani – maannamut pisarnertut – suliart arlallit malittarisassatut tunngavimmi namminerimi imaluunniit malittarisassat allaffissuutigineranni kukkunernik amigaatinillu nalunaarutigineqarsimasut ilanngunneqarsimapput.

Taamaalilluni innutaasut piginnaatitaaffitsigut isumannaatsuutinnissaat pisortatullu oqartussat suliassaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorineqarsinnaavoq.

Taamatut oqaaseqarluni Inatsisartut Ombudsmandiata 2012-imut nalunaarutaa pillugu siunnersuut Inatsisartunit tusaatissatut tiguneqartussanngorlugu Inatsisit Atortinneqarnerannut Ataatsimiititaliap isumaqatigiittup saqqummiuppaat.

Ilanngulluguttaaq Inatsisartut Ombudsmandiat 2012-imi suliaanut annertuunut Inatsisit Atortinneqarnerannut Ataatsimiititaliap qujassuteqassaaq.